



## SIARAN MEDIA

25 SEPTEMBER 2021

### **MOSTI MEMPERKENALKAN PROGRAM RUANG REKA KOMUNITI DAN PLATFORM HUB EKONOMI INOVASI SOSIAL NEGARA KEPADA GOLONGAN TERPINGGIR**

**SEREMBAN, 25 SEPT 2021** – YB Menteri Sains, Teknologi dan Inovasi (MOSTI), YB Dato' Sri Dr. Adham bin Baba hari ini telah melihat secara lebih dekat Program Ruang Reka Komuniti yang merupakan salah satu inisiatif pembangunan usahawan inovasi (*innopreneur*) di bawah Pelaksanaan 100 Hari Pertama beliau.

Program Ruang Reka ini bertujuan menggalakkan lebih ramai kalangan B40 dan M40 terutamanya mereka yang terkesan akibat dari pandemik COVID-19 untuk menceburi bidang keusahawanan berlandaskan Sains, Teknologi dan Inovasi (STI).

Dalam lawatan rasmi ke Ruang Reka Taman Rasa Sayang, Paroi, Negeri Sembilan, YB Dato' Sri Dr. Adham berkata, "MOSTI komited dalam menyediakan satu platform inovasi sosial akar umbi yang dapat memacu etno-teknologi masyarakat tempatan yang berpotensi dikomersialkan untuk menjana kekayaan baru dan pembangunan sosio-ekonomi yang lebih terangkum. Strategi yang berimpak tinggi diatur MOSTI dalam memastikan kelestarian perniagaan usahawan inovasi ini serta pembangunan ekonomi masyarakat yang dibantu."

Tambah beliau, "Bagi memastikan pembangunan komuniti yang lebih mampan, usaha juga dijalankan untuk mengenalpasti dan membangunkan Hub Ekonomi Inovasi Sosial. Hub Ekonomi Inovasi Sosial memainkan peranan penting dalam meningkatkan semangat inovasi dan memperkasa masyarakat dari segi kapasiti pengetahuan, pembelajaran, kesosialan (*socialisation*), pembangunan serta jalinan bertujuan untuk meningkatkan kualiti hidup dan ketahanan masyarakat dari segi ekonomi.

Hub ini akan mewujudkan ekosistem yang inklusif antara inovator, jaringan komuniti serta sokongan agensi kerajaan dan swasta untuk melahirkan lebih ramai usahawan sosial yang dapat memangkinkan kesejahteraan rakyat dari segi penciptaan peluang pekerjaan, peningkatan pendapatan dan merapatkan jurang kemiskinan seiring dengan semangat Keluarga Malaysia yang disarankan oleh YAB Perdana Menteri.

Program Ruang Reka ini dikendalikan oleh Yayasan Inovasi Malaysia (YIM), sebuah agensi di bawah MOSTI, dengan aspirasi menyemai dan membudayakan inovasi. YIM telah menggerakkan pelbagai inisiatif ke seluruh pelusuk Malaysia untuk meningkatkan taraf hidup dan pendapatan komuniti setempat melalui aktiviti pengkomersialan. Melalui Ruang Reka ini, pendedahan dan latihan kemahiran akan diberi kepada masyarakat setempat dalam penggunaan teknologi baharu seperti 3D Printer, Robotik, *Virtual Reality* (VR) dan lain-lain bagi aktiviti inovasi mereka.

Langkah berikutnya adalah dengan menggunakan Ruang Reka secara maksimum oleh komuniti dalam membudayakan kreativiti serta inovasi di peringkat akar umbi. Selain mengukuhkan ekosistem inovasi sosial, ianya turut memperluaskan skala inovasi dengan kerjasama bersama kerajaan, agensi dan swasta.

YIM telah membangunkan dua (2) projek rintis Ruang Reka termasuklah Ruang Reka Taman Rasa Sayang di Paroi ini dan juga Ruang Reka di Projek Perumahan Rakyat (PPR) Hiliran di Kuala Terengganu.

Untuk pencapaian Ruang Reka di Paroi, seramai 100 pelajar yang menggunakan ruang belajar di sini untuk persediaan SPM telah mendapat keputusan cemerlang dan seramai 75 peratus pelajar berminat kepada STI.

**-TAMAT-**

**Khairul Anuar bin Muhamad Noh**

Komunikasi Korporat  
Yayasan Inovasi Malaysia  
[khairul@yim.my](mailto:khairul@yim.my)  
+60 13-395 7650

**Puteri Amira binti Azhar**

Komunikasi Korporat  
Yayasan Inovasi Malaysia  
[amira@yim.my](mailto:amira@yim.my)  
+60 18-9233598

**Mengenai Yayasan Inovasi Malaysia (YIM):**

Yayasan Inovasi Malaysia (YIM) merupakan sebuah agensi di bawah Kementerian Sains, Teknologi dan Inovasi (MOSTI) yang ditubuhkan pada tahun 2008 bertujuan memacu inovasi dan kreativiti dalam kalangan rakyat Malaysia, memfokuskan kepada golongan kanak-kanak, belia, wanita, penduduk luar bandar, kumpulan B40, orang kelainan upaya (OKU) serta organisasi bukan kerajaan.